

四庫全書

集部

欽定四庫全書

集部

王文成全書卷三十八

詳校官編修_臣曹錫齡

中書_臣劉源溥覆勘

總校官原任中允_臣王燕緒

校對官學正_臣常循

謄錄監生_臣舒秀岐

欽定四庫全書

王文成全書卷三十八

明 王守仁 撰

附錄七

世德紀附錄

辯忠讒以定國是疏

門人陸澄

臣切見巡按江西監察御史程啟充戶科給事中毛玉
各論劾丁憂新建伯王守仁似若心跡未明功罪未當
者此論一倡一二嫉賢妬功之徒固有和者而在朝在
市冤憤不平臣係守仁門生知之最詳冤憤特甚敢昧

死一言謹按守仁學本誠明才無文武抗言時事致忤
逆瑾杖之幾死謫居龍場居夷處困動心忍性獨悟道
真荷先帝收用屢遷至於巡撫其在南贛四征而福建
湖廣廣東江西數十年之巨寇為之蕩平因奉勅勘事
福建道由江西至於豐城遭遇賊變拜天轉風舟返吉
安倡義督兵不旬月而賊滅人但見其處變之從容而
不知其忠誠之激切人但見其成功之迅速而不知其
謀畧之淵微人但見其遭非常之構陷而禍莫能中而

不知其守身無毫髮之可疵當時張銳錢寧輩以不遂
賣國之計而恨之張忠江彬輩以不遂冒功之私而恨
之宸濠劉吉輩以不遂篡逆之謀而恨之凡可以殺其
身而赤其族者誅求搜剔何所不至使守仁而初有交
好之情中有猶豫之意後有貪冒之為諸人其肯隱忍
而不發乎迨皇上龍飛而褒慰殊恩形於詔旨天下方
快朝廷之清明不意功罪既白賞罰既定乃復有此怪
僻顛倒之論欲以曖昧不明之事而掩其顯著不世之

功天理人心安在哉論者之意大畧有六一謂宸濠私書有王守仁亦好一語二謂守仁曾遣冀元亨往見宸濠三謂守仁亦因賀宸濠生辰而來四謂守仁起兵由於致仕都御史王懋中知府伍文定攀激五謂守仁破城之時縱兵焚掠而殺人太多六謂宸濠本無能為一知縣之力可擒守仁之功不足多而其捷本所陳粧點過實然究其本心不過忌其功名而已宸濠私書王守仁亦好之說乃啓充得於湖口知縣章玄梅者切惟刑

部節奉欽依原搜簿籍既未送官封記收掌又事發日久別生事端委的真偽難辨無憑查究著原搜獲之人盡行燒毀欽此今玄梅之書從何而來使有之何足憑據且出於宸濠之口尤其不足取信者夫豪傑用意類非尋常可測守仁雖有防宸濠而圖之之意使幾事不密則亦不過如孫燧許達之一死以報國而已其何以成後功以貽皇上今日之安哉設使守仁畧有交通宸濠之迹而卒以滅之其心事亦可以自白況可以不足

憑信之迹遂疑其心而舍其討賊之大功哉其遣冀元亨往見者是守仁知宸濠素蓄逆謀而元亨素懷忠孝欲使啓其良心而因以探其密計爾元亨一見不合而歸使言合志投當留信宿何反逆之日反在千里之外乎今元亨之冤冤既伸而守仁之心事不白天理人心何在乎毛玉疑守仁因賀宸濠生辰而偶爾遇變殊不知守仁奉勅將往福建而瑞金會昌等縣瘴氣生發不敢經行故道出豐城且宸濠生日在十三而守仁十五

方抵豐城若賀生辰何獨後期而至乎其謂守仁由王
懋中等攀激起兵尤為乖謬守仁近豐城五里而聞變
即刻偽寫兩廣都御史楊旦大兵將臨火牌於知縣顧
佖接見之時令人詐為驛夫入遞守仁佯喜以為大兵
既至賊必易圖當令顧佖傳牌入城以疑宸濠又令顧
佖守城許與撥兵助守時有報稱宸濠遣賊六百追虜
王都者守仁回船而南風大逆乃慟哭告天而頃刻反
風守仁又恐賊兵追至急乘漁舟脫身此時王懋中安

在次日奔至蛇河遇臨江知府戴德孺即議起兵因不足恃又奔入新淦城欲與知縣李美集兵度不可居復奔至吉安見倉庫充實遂乃駐劄傳檄各處起調軍民一面榜募忠義之士方令伍文定以書請各鄉官王懋中等盟誓勤王而懋中又遲疑二日乃始同盟夫各府及萬之兵若非提督軍門以便宜起調其肯聽致仕鄉官而集乎今乃顛倒其說至謂守仁掩懋中之功天理人心安在乎至於破城之時焚者宮中自焚故內室毀

而外宇存官兵但救而無焚也掠者伍文定之兵乘勝奪賊衣資衆兵不然也殺人者知縣劉守緒所領奉新之兵以守仁號令閉門者生迎敵者死故殺迎敵者百餘人及守仁至斬官兵殺掠者四十六人遂無犯者矣且省城之人各受宸濠銀二兩米一石與之拒守是賊也殺之何罪又宮為賊巢財皆賊贓焚之掠之亦何罪哉今舍其大功而摘其小過幾何而不為逆賊報仇乎且宸濠勢焰薰天觸者萬死人皆望風奔靡而已及守

仁調兵四集搗其巢穴散其黨與數敗之餘羽翼俱盡
妻妾赴水乃窮寇爾夫然後知縣王冕得以近之今乃
以為一知縣可擒甚無據也果若所言則孫燧許達何
為被殺而三司衆官何為被縛耶楊銳張文錦何為守
之一月不敢出戰必待省城破而賊自解圍耶伍文定
何以一敗而被殺者八百人其餘諸將又何以戰之三
日而後擒滅耶至若捷本所陳若作偽牌以疑賊心行
反間以解賊黨之類所不載者尤多而謂以無為有可

乎夫宸濠積謀有年一旦大發震撼兩京而守仁以一書生談笑平之於數日之內功亦奇矣使不即滅而貽先帝親征之勞臣不知賣國之徒計安出也使不即滅先帝崩臣又不知聖駕之來能高枕無憂否也今建不世之功而遭不明之謗天理人心安在哉臣知守仁之心決非榮辱死生所能動者但恐公論不昭而忠臣義士解體爾此萬世忠義之冤而國是之大不定者宜乎天變之疊見也臣與守仁分係師生義均生死前之所

辯天下公言伏願聖明詳察乞降綸音慰安守仁仍戒飭言官勿為異論庶幾國是以定而亦消天變之一端也臣干冒天威不勝戰慄待罪之至

明軍功以勵忠勤疏

門人黃綰

臣聞賞罰者人主御天下之操柄也得其操柄死命可致天下可運之掌不得其操柄百事具廢欲治得手故明主慎之至親不可移至讐不可奪有功必賞有罪必誅然必稱天以命之示非私也臣下視之不飾虛譽不

結援黨不思賄託惟勉忠勤死不敢易欲不治得乎今
或不然凡飾譽援黨賄託譏讒不及必獲顯擢無不如
意凡盡忠勤職即譏讒蜚集黜辱隨至無不失意以此
操柄失御人皆以奸結巧避為賢孰肯身任國家事哉
臣不能枚舉姑以先朝末年陛下初政一事論之如宸
濠構逆虐焰吞天藩郡震動宗親懾憂陛下當身見之
矣腹心應援布滿中外鼎卿近倖賄賂交馳賣國奸臣
待時發動兩京乏備四路無人方鎮遠近莫之如何握

兵觀望滔滔皆是惟鎮守南贛都御史王守仁領勅福建勘事道經南昌中途聞變指心籲天誓不與賊俱生赤身孤走設奇運謀乃遣優人賁諜假與天兵約征方鎮會戰俾其邀獲以示有脩牽疑賊謀以俟四路設備中執叛臣家屬繆托腹心又示無為以安其心然後激衆以義糾集烏合待兵成慮審發書罵賊使覺悔既出攝兵收復南昌按甲待之賊至安慶攻城方銳警聞使還筭其歸途水陸邀擊大潰賊衆遂擒宸濠于樵舍兵

法有先勝而後求戰者非此謂也成功之後江右瘡痍未復武宗皇帝南巡奸權攘功嫉譖百端危疑莫測守仁恭勤曲致方靖地方僅獲身免守仁為忠可謂艱貞竭盡者矣使時無守仁倡義統衆謀獲機宜戰取有方安慶卒破金陵不保長驅北上應援蜂起腹心陰助京師存亡未可知也雖畢竟天命有在終必殲夷曠日持久士夫戮辱蒼生荼毒可勝言也守仁南贛鎮守地方之責初無所與今受責地方者遇事不敢擔當不過告

變待命而已守仁家于浙之山陰淞乃江右通衢兵力
素弱長驅或下父兄宗族有噍類乎此時守仁夫豈不
思但忘私奉公以為社稷不幸或敗夷滅何悔守仁之
志可謂精貫白日者矣幸而成功宇內太平所謂徙薪
曲突人不為功亦不致思其忠又守仁於武宗初年劉
瑾為奸人莫敢言守仁斥之觸恨選杖毒決碎屍折髀
死而復甦流竄瘴裔久方赦還始獲錄用乃者南贛乏
鎮谿谷克民聚黨為盜視効虐劫肆無忌憚凡在虔楚

閩廣接壤山澤無非賊巢大小有司束手無策皆謂終
不可理守仁鎮守未及三年兵威武畧奇變如神以故
茶寮桶岡諸寨大冒瀝頭諸寨次第擒滅增縣置邏立
明約遂為治境視古名將何以過此江右之民為立生
祠歲時祝祭民心不忘亦可見矣曩者陛下登極命取
來京宴賞封之新建伯而陞南京兵部尚書言者又謂
不當來京宴賞以致奢費夫陛下大官之厨日用無紀
較諸一食之宴所費幾何猶煩論之北京豈無一職必

欲置之南京此乃邪比蔽賢嫉功之所為也守仁後丁父憂服滿遂不起用反時造言排論然雖蒙拜爵陞官鐵券未給祿米未頒朝事無與跡比樵漁縱使有過何庸論之況有功無過哉其意尤可知矣不獨守仁凡共勤王大小臣工亦廢黜殆盡臣不能枚舉姑以一二論之彼時領兵知府惟伍文定得陞副都御史得廕一子千戶邢珣徐璉但陞布政即令閒住彼亦何過縱使有過八議惡在戴德孺雖陞布政即死于水皆無廕子副

使陳槐因勸宰臣進賢致怒讐人希意誣之獨黜為民
御史伍希儒謝源輒以考察去官且陳槐邢珣等皆抱
用世之才秉捐軀之義因功廢黜深可太息然在今日
陛下操柄之失莫此為甚他日無事則可萬一有事將
誰効用哉况守仁學原性命德由忠恕才優經濟使之
事君處物必能曲盡其誠尤足以當薰陶備顧問以陛
下不世出明聖之資與之浹洽講明天下之治生民之
福豈易言哉前者言官屢薦故尚書席書吳廷舉今侍

郎張璉桂萼皆薦之曾蒙簡命用為兩廣總制臣謂總制寄止一方何若用之廟堂可以贊襄謀議轉移人心所濟天下矣伏惟陛下念明良遭遇之難蚤召守仁令與大學士楊一清等共圖至治另推才能為兩廣總制仍勅該部給與守仁應得鐵券祿米將陳槐邢珣徐璉等起用伍希儒謝源等查酌軍功事例議錄戴德孺量與蔭襲此實陛下奉天所操之大柄不可毫髮移奪者宜早收之以為使人宣忠効力之權臣不勝懇悃之至

地方疏

霍韜

竊見新建伯南京兵部尚書兼都察院左都御史王守仁奉命巡撫兩廣已將田州思恩撫處停當隨復剿平八寨及斷藤峽等賊臣等皆廣東人與賊隣壤備知各賊為患實跡嘗竊切齒感額而歎曰兩廣良民何其不幸生隣惡境妻子何日寧也又嘗竊計曰兩廣何日得一好官員剿平各賊俾良民各安其生而頑民染患未深者亦得格心向化也乃今恭遇聖明特起王守仁撫

剿田州思恩地方臣等竊謀曰兩廣自是有底寧之期也聖天子知人之澤也是後也臣等為王守仁計曰前巡撫動調三省兵若干萬梧州三府積年儲蓄軍餉費用不知若干萬復從廣東布政司支去庫銀若干萬米不知支去若干萬殺死疫死狼兵鄉兵民壯打手不知若干萬僅得田州安靖五十日耳自是而思恩叛矣吊巖賊出圍肇慶府矣殺數千家矣此賊併時同出蓋與田州思恩東西相應和者也若王守仁者乘此大敗極

敝之後仰承聖明特擢之恩雖合四省兵力再支庫銀
百餘萬支米數百萬剿平田州報功級數萬人亦且曰
天下大功也然而守仁不役一卒不費斗糧只宣揚聖
下聖德遂致思恩田州兩府頑民稽首來服其奉揚聖
化以來遠人雖舜格有苗何以過此臣等是以歎服王
守仁不惟能肅將天威實能誕敷文德也若八寨之賊
斷藤峽之賊又非田州思恩可比也天下十二省俱多
平壤惟廣西獨在萬山之叢其土險其水迅其山之高

有猿猴不度飛鳥不越者故諺語曰廣西民三而賊七
由山高土惡氣習兇悍雖良民至者亦化為賊也八寨
賊洪武年間所不能平斷藤峽成化八年都御史韓雍
僅得討平及今五十餘年遺孽復熾故廣西賊巢柳州
慶遠鬱林府江諸賊雖時出劫掠官兵亦屢請征之若
八寨賊則自國初至今未有輕議征剿者蓋謂山水兇
惡進兵無路消息少動賊已先知一夫控險萬兵莫敵
故百六十年未有敢征八寨賊者也賊亦恃險肆惡時

出攻圍城堡殺掠良民何啻萬計四方頑民犯罪脫逃
投入八寨則有司不敢追攝矣鄰近流賊避兵追剿投
入八寨則官兵不敢誰何矣是八寨者實四方寇賊淵
藪也斷藤峽又八寨之羽翼也廣西有八寨諸賊猶人
有心腹疾也八寨不平則兩廣無安枕期也今王守仁
沉機不露掩賊不備一舉而平之百數十年豺虎窟穴
掃而清之如拂塵然非仰藉聖人神武不殺之威何以
致此臣等是以歎服王守仁能體陛下之仁以懷綏田

州思恩向化之民又能體陛下之義以討服八寨斷藤峽梗化之賊也仁義之用兩得之也謹按王守仁之成功有八善焉乘湖兵歸路之便則兵不調而自集一也因田州思恩效命之助則勞而不怨二也機出意外賊不及遽所誅者真積年渠惡非往年濫殺報功者比三也因歸師討逆賊無糧運之費四也不役民兵不募民馬一舉成功民不知擾五也平八寨平斷藤峽則極惡者先誅其細小巢穴可漸施德化使去賊從良得撫剿

之宜六也八寨不平則西而柳慶東而羅旁綠水新寧
恩平之賊合數千里共為窟穴雖調兵數十萬費糧數
百萬未易平伏今八寨平定則諸賊可以漸次撫剿兩
廣良民可漸安生業紓聖明南顧之憂七也韓雍雖平
斷藤峽賊矣旋復有賊者實當爾時未及區畫其地為
經久圖俾餘賊復據為巢穴故也今五十年生聚則賊
復熾盛也亦宜若八寨乃百六十年所不能誅之劇賊
山川天險尤難為功今守仁既平其巢窟即徙建城邑

以鎮定之則惡賊失險後日固不能為變逋賊來歸不日且化為良民矣誅惡綏良得民父母之體八也或者議王守仁則曰所奉命撫剿田州思恩也乃不剿田州則亦已矣遂剿八寨可乎臣則曰昔吳楚反攻梁景帝詔周亞夫救梁亞夫不奉詔而絕吳楚糧道遂破吳楚而平七國安漢社稷夫不奉詔大罪也景帝不以罪亞夫何也傳曰闡以內寡人制之闡以外將軍制之又曰大夫出疆有可以安國家利社稷專之可也古之道也

是故周亞夫知制吳楚在絕其食道而不在於救梁也是故雖有詔命猶不受也惟明君則以為功若腐儒則以為罪今王守仁知田州思恩可以懷德也遂約其降而安定之知八寨諸賊百六十年未易服也遂因時仗義而討平之仁義之用達天德者也雖無詔命先發後聞可也況有便宜從事之旨乎或者又曰建置城邑大事也區處錢糧戶部職也不先奏聞而輒興功可乎臣則曰古者帝王千里之內自治千里之外附之侯伯而

已是豈堯舜湯武聖智反後世不如哉蓋慮輿圖既廣則智力不及與其役一已耳目之力而無益於事孰若以天下賢才理天下事為逸而有功也是故帝王之職在於知人而已既知其人之賢而委任之矣則事之舉錯一以付之而責其成功若功效不孚乃制其罪可也今既任之又從而牽制之則豪傑何所措手足乎是故王守仁之平八寨也所殺者賊之渠魁耳若逋逃者固未及殺也乘此時機建置城邑遂招逋逃之賊復業焉

則積年之賊皆可化為良民也失此機會撤兵而歸俟
奏得旨乃興版築則賊漸來歸又漸生聚據險結寨以
抗我師雖欲築城亦不能矣昔者范仲淹之守西邊也
欲築大順城慮敵人爭之乃先具版築然後巡邊急速
興工一月成城西夏覺而爭之已不及矣爾時范仲淹
若俟奏報豈不敗乃事哉王守仁於建置城邑之役盖
計之熟矣錢糧夫役固不仰足戶部而後有處也其以
一肩而分聖明南顧之憂可謂賢矣不以為功反以為

過可乎先是正德十四年宸濠謀反江西兩司僉首從賊惟王守仁同御史伍希儒謝源哲意效忠不幸奸臣張忠許泰等欲掩王守仁之功以為已有乃揚諸人曰王守仁初同賊謀及公論難掩乃又曰宸濠金帛俱王守仁伍希儒謝源滿載以去當時大學士楊廷和尚書喬宇亦忌王守仁之功遂不與辯白而黜伍希儒謝源俾落仕籍王守仁不辯之謗至今未雪可謂啞啞之冤矣夫國家論功有二道焉有開國效功之臣焉有定亂

拯危之臣焉開國之臣成則侯也敗則寇也雖勿闕焉可也惟禍變倏起社稷安危凜乎一髮效忠定亂之臣則不忘也何也所以衛社稷也昔者王守仁之執宸濠也可謂定亂拯危之功矣奸人猶或忌之而謗其短夫如是則後有事變誰肯效忠乎甚矣小人忌功足以誤國也臣等是以歎曰王守仁等江西之功不白無以勸勵忠之臣若廣西之功不白又無以勸策勲之臣是皆天下地方大慮也王守仁大臣也豈以功賞有無為重輕

哉第恐當時有功之人及土官立功之人視此解體則
在外撫臣遂無所激勸以為建功之地耳臣等廣人也
目擊八寨之賊為地方大患百數十年一旦仰賴聖明
任用守仁以底平定不勝慶忭今兵部功賞未見施行
戶部覆題又復再勘臣恐機會一失大功遂沮城堡不
得修築逋賊復據巢穴地方不勝可慮也是故冒昧建
言惟聖明察焉乞早裁斷俾官僚早得激勸城寨早得
修築逋賊早得招安良民早得復業嶺海之外歌詠太

平祝頌聖德實臣等所以報陛下知遇一節也亦臣等
自為地方大慮也不得已也為此具奏

征宸濠反間遺事

錢德洪

龍光云是年六月十五日公於豐城聞宸濠之變時叅
謀雷濟蕭禹在侍相與拜天誓死起兵討賊欲趨還吉
安南風正急舟不能動又痛哭告天頃之得北風宸濠
追兵將及潛入小漁船與濟等同載得脫免舟中計議
恐宸濠徑襲南京遂犯北京兩京倉卒無備欲圖沮撓

使遲留半月遠近聞知自然有備無患乃假寫兩廣都御史火牌云提督兩廣軍務都御史楊為機密軍務事准兵部咨及都察院右副都御史顏咨俱為前事本院帶領狼達官兵四十八萬齊往江西公幹的於五月初三日在廣州府起馬前進仰沿途軍衛有司等衙門即便照數預備糧草伺候官兵到日支應若臨期缺乏悞事定行照依軍法斬首等因意示朝廷先差顏等勘事已密於兩廣各處起調兵馬潛來襲取宸濠使之恐懼

遲疑觀望不敢輕進使濟等密遣乖覺人役持火牌設法打入省城宸濠見火牌果生疑懼十八日回至吉安又令濟等假寫南雄南安贛州等府報帖日逐飛報府城打入省下一以動搖省城人心一以鼓勵吉安效義之士又與濟等謀假寫迎接京軍文書云提督軍務都御史王為機密軍務事准兵部咨該本部題奉聖旨許泰邵永分領邊軍四萬從鳳陽等處陸路徑撲南昌劉暉桂勇分領京邊官軍四萬從徐州淮安等處水陸並

進分襲南昌王守仁領兵二萬楊旦等領兵八萬秦金等領兵六萬各從信地分道並進刻期夾攻南昌務要遵照方畧并心協謀依期速進毋得彼先此後致悞事機欽此等因咨到職除欽遵外照得本職先因奉勅前往福建公幹行至豐城地方卒遇寧王之變見已退往吉安府起兵今准前因遵奉勅旨候兩廣兵齊依期前進外看得兵部咨到緣由係奉朝廷機密勅旨皆是掩其不備先發制人之謀其時必以寧王之兵尚未舉動

今寧王之兵已出約亦有二三十萬若北來官兵不知
的實消息未免有悞事機以本職計之若寧王堅守南
昌擁兵不出京邊官軍遠來天時地利兩皆不便一時
恐亦難圖須是按兵徐行或分兵先守南都候寧王已
離江西然後或遮其前或擊其後使之首尾不救破之
必矣今寧王主謀李士實劉養正等各有書密寄本職
其賊將凌十一閔廿四亦各密差心腹前來本職遞狀
皆要反戈立功報效可見寧王已是衆叛親離之人其

敗必不久矣今聞兩廣共起兵四十八萬其先鋒八萬
係遵勅旨之數今已到贛州地方湖廣起兵二十萬其
先鋒六萬係遵勅旨之數今聞已到黃州府地方本職
起兵十萬遵照勅旨先領二萬屯吉安府地方各府知
府等官各起兵快約亦不下一萬之數共計亦有十一
二萬人馬儘已穀用但得寧王早離江西其中必有內
變因而乘機夾攻為力甚易為此今用手本備開緣由
前去煩請查照裁處并將一應進止機宜計議停當選

差年覺曉事人員與同差去人役星夜回報施行須至
手本者既已寫成手本令濟等選差慣能走遞家人重
與盤費以前事機陽作實情脩細密切說與令渠潛踪
隱跡星夜前來南京及淮揚等處迎接官兵又令濟等
尋訪素與宸濠交通之人厚加結納令渠密去報知寧
府宸濠聞知大加賞賜差人四路跟捉既見手本愈加
疑懼將差人備細拷問詳悉當時殺死因此宸濠又疑
李士實劉養正不信其謀又與龍光計議假寫回報李

士實書內云承手教密示足見老先生精忠報國之本
心始知近日之事迫於勢不得已而然身雖陷於羅網
乃心罔不在王室也所喻密謀非老先生斷不能及此
今又得子吉同心協力當萬萬無一失矣然機事不密
則害成務須乘時待機而發乃可不然恐無益於國而
徒為老先生與子吉之累又區區心所不忍也況今兵
勢四路已合只待此公一出便可下手但恐未肯輕出
耳昨凌閱諸將遣人密傳消息亦皆出於老先生與子

吉開導激發而然但恐此三四人者皆是粗漢易有漏
泄須戒令慎密又曲為之防可也目畢即付丙丁知名
不具與劉養正亦同兩書既就遣雷濟設法差遞李士
實龍光設法差遞劉養正各差遞人皆被宸濠殺死宸
濠由是愈疑劉李劉李亦各自相疑懼不肯出身任事
以故上下人心互生疑懼兵勢日衰又遣素與劉養正
交厚指揮高睿致書劉養正及遣雷濟蕭禹引誘內官
萬銳等私寫書信與內官陳賢劉吉喻木等俱皆反間

之謀又多寫告示及招降旗號開諭逆順禍福及寫木牌等項動以千計分遣雷濟蕭禹龍光王佐等分役經行賊壘潛地將告示粘貼及旗號木牌四路標插又先張疑兵於豐城示以欲攻之勢又遣雷濟龍光將劉養正家屬在吉安者厚加看養陰遣其家人密至劉養正處傳遞消息亦皆反間之謀初時宸濠謀定六月十七日出兵自己於二十二日在江西起馬徑趨南京謁陵即位遂直犯北京因聞前項反間疑沮之謀遂不敢輕

出故十七等日先遣兵出攻南康九江而自留省城賊
兵等候宸濠不出亦各疑懼退沮久駐江湖之上師老
氣衰又見四路所貼告示及挿旗號木牌人人解體日
漸離散以故無心攻鬪其後宸濠探知四路無兵前項
事機已失兵勢已阻人馬已散多有潛來投降者我師
一候宸濠出城即統伍知府等官兵疾趨攻破省城度
宸濠顧念根本之地勢必歸救遂預發兵迎擊於鄱陽
湖大戰三日罪人斯得

右反間始末嘗聞諸吉水致仕縣丞龍光光謂德洪曰昔夫子寫楊公火牌將發時雷濟問曰寧王見此恐未必信曰不信可疑否對曰疑則不免夫子笑曰得渠一疑彼之大事去矣既而歎曰宸濠素行無道殘害百姓今雖一時從逆者衆必非本心徒以威劫利誘苟一時之合耳縱使奮兵前去我以問罪之師徐躡其後順逆之勢既判勝負預可知也但賊兵早越一方遂破殘一方民命虎兕出柙收之遂難為今

之計只是遲留宸濠一日不出則天下實受一日之福光又言夫子捷䟽慮繁文太多一切反間之計俱不言及亦以設謀用詭非君子得已之事不欲明言示人當時若使不行間計遲留寧王寧王必即時擁兵前進正所謂迅雷不及掩耳兩京各路何恃為備所以破敗寧王使之坐失事機全是遲留寧王一着所以遲留寧王全是謀行反間一事今人讀奏冊所報皆是可書之功而不知書不能盡者十倍於奏冊

又言寧藩事平之後京邊官軍南來失其奸計由是
痛恨夫子百計搜尋羅織無所泄毒擠怒門人冀元
亨與濟禹光等俱欲置之死地冀元亨被執光等四
竄逃匿家破人亡妻子離散直伺官軍離却省城方
敢出身回家當時光等粘貼告示標插旗號木牌皆
是半夜昏黑衝風冒雨涉險破浪出入賊壘萬死中
得一生所差行間人役被宸濠要殺者俱是親信家
人今當事平之後議者不究始原終并將在冊功次亦

盡削去此光等走役微勞雖皆臣子本分不足深惜
但賞罰若此繼後天下倘或再有事變人皆以光等
為鑒戒矣誰肯復效死力哉又言夫子應變之神真
不可測時官兵方破省城忽傳令造免死木牌數十
萬莫知所用及發兵迎擊宸濠於湖上取木牌順流
放下時賊兵既聞省城已破脅從之衆俱欲逃竄無
路見水浮木牌一時爭取散去不計其數二十五日
賊勢尚銳值風不便我兵少挫夫子急令斬取先却

者頭知府伍文定等立於銃砲之間方奮督各兵殊死抵戰賊兵忽見一大牌書寧王已擒我軍毋得縱殺一時驚擾遂大潰次日賊兵既窮促宸濠思欲潛遁見一漁船隱在蘆葦之中宸濠大聲叫渡漁人移棹請渡竟送中軍諸將尚未知也其神運每如此又言嘗聞雷濟云夫子昔在豐城聞變南風正急拜天哭告曰天若憫惻百萬民命幸假我一帆風須更風稍定頃之舟人謹譟回風濟禹取香煙試之舟上果

然久之北風大作宸濠追兵將及時夫人公子在舟
夫子呼一小漁船自縛勅令濟禹持米二斗齎魚五
寸與夫人為別將發問濟曰行備否濟禹對曰已備
夫子笑曰還少一物濟禹思之不得夫子指船頭羅蓋
曰到地方無此何以示信於是又取羅蓋以行明日
至吉安城下城門方戒嚴舟不得泊岸濟禹揭羅蓋
以示城中遂謹慶曰王爺爺還矣乃開門羅拜迎入
於是濟禹心歎危迫之時暇裕乃如此德洪昔在師

門或問用兵有術否夫子曰用兵何術但學問純篤
養得此心不動乃術爾凡人智能相去不甚遠勝負
之決不待卜諸臨陣只在此心動與不動之間昔與
寧王逆戰於湖上時南風轉急面命某某為火攻之
具是時前軍正挫却某某對立矍視三四申告耳如
弗聞此輩皆有大名於時者平時智術豈有不足臨
事忙失若此智術將安所施又嘗聞鄒謙之曰昔先
生與寧王交戰時與二三同志坐中軍講學謀者是

報前軍失利坐中皆有怖色先生出見諜者退而就
坐復接緒言神色自若頃之諜者走報賊兵大潰坐
中皆有喜色先生出見諜者退而就坐復接緒言神
色亦自若又嘗聞陳惟濬曰惟濬嘗聞之尚謙矣尚
謙言昔見有侍於先生者自稱可與行師先生問之
對曰某能不動心曰不動心可易言耶對曰某得制
動之方先生笑曰此心當對敵時且要制動又誰與
發謀出慮耶又問今人有不知學問者儘能履險不

懼是亦可與行師否先生曰人之性氣剛者亦能履險不懼但其心必待強持而後能即強持便是本體之蔽便不能宰割庶事孟施舍之所謂守氣者也若人真肯在良知上用功時時精明不蔽於欲自能臨事不動不動真體自能應變無言此曾子之所謂守約自反而縮雖千萬人吾往者也又嘗聞劉邦采曰昔有問人能養得此心不動即可與行師否先生曰也須學過此是對刀殺人事豈意想可得必須身習

其事斯節制漸明智漸周方可信行天下未有不
履其事而能造其理者此後世格物之學所以為謬
也孔子自謂軍旅之事未之學此亦不是謙言但聖
人得位行志自有消變未形之道不須用此後世論
治根源上全不講及每事只在半中截做起故犯手
脚若在根源上講求豈有必事殺人而後安得人之
理某自征贛以來朝廷使我日以殺人為事心豈割
忍但事勢至此譬之既病之人且須治其外邪方可

扶回元氣病後施藥猶勝立視其死故耳可惜平生精神俱用此等沒緊要事上去了昔者德洪事先生八年在侍同門每有問兵事者皆默而不答以故南贛寧藩始末俱不與聞先生沒後搜錄遺書七年而奏疏文移始集及查對月日而後五征始末具見獨於用間一事昔嘗槩聞奏疏文移俱無所見去年德洪主試廣東道經江西訪問龍光始獲間書間牌諸稿并所聞於諸同門者歸以附錄云時嘉靖乙未八

月書於姑蘇之郡學

陽明先生平濬頭記

大學士湖東費宏

惠之龍川北抵贛其山谷賊巢亡慮數百而濬頭最大
濬之賊肆惡以毒吾民者亡慮數千而池仲容最著仲
容之放兵四劫亡慮數十年而龍川翁源始興龍南信
豐安遠會昌以邇巢受毒尤數正德丁丑之春信豐復告
急於巡撫都御史王公伯安召諸縣苦賊者數十人問
何以攻之皆謂非多集狼兵弗濟又謂狼兵亦嘗再用

矣竟以招而後定公曰盜以招蔓此頃年大弊也吾方懲之且兵無常勢奚必狼而後濟耶若等能為吾用獨非兵乎乃與巡按御史屠君安卿毛君鳴岡合疏以剿請又請重兵權肅軍法以一士心詔加公提督軍務賜之旗牌聽以便宜區畫惟功之有成不限以時時橫水桶岡盜亦起而視洌為急公議先攻二峒乃會兵以圖洌凡軍中籌畫多諮之兵備副使楊君廷宜請募諸縣機兵而以其傭募新民之任戰者取贖金儲穀鹽課以

餉之而兵與食足焉二峒之攻慮仲容乘虛以擾我也

謀伐其交使辨士周祥

闕

其黨黃金巢等得降者五

百人籍以為兵仲容

闕

憤不從冬初聞橫水破始懼使

弟仲安率老幼三百人來圖緩兵且我覘也公陽許之
使據上新地以遏桶岡之賊而實遲其歸圖閱月仲容
聞桶岡破益懼為脩益嚴公使以牛酒訶之賊度不可
隱則曰盧珂鄭志高陳英吾讎也恐其見襲而併之耳
珂等皆龍川歸順之民有衆三千仲容脅之不可故深

讐之公方欲以計生致仲容乃陽檄龍川盧珂等構兵之實若甚恐焉趨利刊木且假道以誅珂黨十二月望珂等各來告仲容必反公復怒其誣構叱收之陰諭意向使遣人先歸集衆時兵還自桶岡公合樂大饗散之歸農示不復用使仲安亦領衆歸又遣指揮余恩諭仲容毋撤備以防珂黨仲容益喜前所使辨士因說之親詣公謝且曰往則我公信爾無他而誅珂等必矣仲容然率四十人來見公聞其就道也密飭諸縣勒兵分哨又

使千戶孟俊偽持一檄經洎巢宣言將拘珂黨實覺集其兵也賊導俊出境不復疑閏十二月下弦仲容既至贛是夕釋珂等馳歸縻仲容令官屬以次饗犒明年正月癸卯肫公度諸兵已集引仲容入并其黨擒之出珂等所告訊鞠具狀亟使人約諸兵入巢越四日丁未同時並進其軍於龍川者惠州知府陳祥率通判徐璣從和平都入指揮姚璽率新民梅南春等從烏龍鎮入孟俊率珂等從平地水入軍于龍南者贛州知府邢珣率

同知夏克義知縣王天與等從太平保入推官危壽率義民葉方等從南平入守脩指揮郝文率義民孫洪舜等從冷水逕入余恩率百長王受等從高砂保入軍于信豐者南安知府李敷率訓導藍鐸等從黃田岡入縣丞舒富率義民趙志標等從烏逕入公自率中堅督文搗下泚大巢副使君督餘哨會於三泚賊黨自仲容至贛脩已弛矣至是聞官兵驟入皆驚失措乃分投出禦而悉其精銳千餘迎敵于龍子嶺我兵列為三衝犄角

而前恩以受兵首與賊戰却之奮追里許賊伏四起擊
受後壽乃以方兵鼓噪往援俊復以珂等兵從旁衝擊
呼聲震山谷賊大敗而潰遂併上中二剝克之各哨兵
乘勝奮擊是日遂破巢十一曰熱水曰五花障曰淡方
曰石門曰上下陵曰芳竹湖曰白沙曰曲潭曰赤塘曰
古坑曰三坑明日探賊所奔分道急擊已酉破巢凡六
曰鐵石障曰羊角山曰黃田坳曰嶺岡曰塘含岡曰溪
尾庚戌破巢凡二曰大門山曰鎮里寨辛亥破巢凡九

曰中村曰半逕曰都坑曰尺八嶺曰新田逕曰古地曰
空背曰旗嶺曰頓岡癸丑破巢凡四曰狗脚坳曰水晶
洞曰五洞曰藍州丙辰破巢凡二曰風盤曰茶山其奔
者尚八百餘徒聚于九連山山峻而袤廣與龍門山後
諸巢接公慮以兵進逼其勢必合合難制矣乃選銳士
七百餘人衣所得賊衣若潰而奔取賊所據厓下澗道
乘暮而入賊以為其黨也從厓下招呼我兵亦佯與和
應已度險扼其後路明日賊始覺併力來敵我兵從高

臨下擊敗之公度其必潰也預戒各哨設伏以待乙丑
覆之于五花障于白沙于銀坑水丁卯覆之于烏龍鎮
于中村于北山于風門輿分逃餘孽尚三百餘徒各哨
乃會兵追之二月辛未復與戰于和平甲戌戰于上坪
下坪丁丑戰于黃田均辛巳戰于鐵障山癸未戰于乾
村于黎樹乙酉戰于芳竹壬辰戰于百順于和峒乙未
戰于水源于長吉于天堂寨謀報各巢之稔惡者蓋幾
盡矣惟脅從二百餘徒聚九連山谷呼號乞降公遣珣

往撫之籍而處之白沙公率副使君乃即祥應和平相其險易經理立縣設隘庶幾永寧遂班師而歸蓋戊寅三月丁未也凡所搗賊巢三十八所擒斬賊酋二十九人中酋三十八人從賊三千六十八人俘賊屬男婦八百九十人鹵獲馬牛噐仗稱是是役也以力則兵僅數千以時則旬僅六浹遂能滅此兇狡稽誅之虜以除三徼數十年之大患其功偉矣捷聞有詔褒賞官公之子世錦衣百戶副使君加俸一秩於是邢侯夏侯危侯偕

通判文侯運吳侯昌謂公茲舉足以威不軌而昭文德
不可以無傳也使人自贛來請予書其事嗟乎惟兵者
不祥之器王公用儒者謀謨之業而乃躬擐甲冑率先
將士下上山谷與死寇角勝爭利出於萬死而公平日
豈習殺伐之事而貪取摧陷之功以為快哉顧盜之於
民不容並育譬則莠驕害稼而養之弗薊縱虎狼之狂
噬而聽孽牧之衰耗此不仁者所不忍為而公亦必不
以不仁自處也公之心予知之公之功則播之天下傳

之後世何俟於予之書之也然而人知渠魁之坐縛兇孽之蕩平以為成功如此其易而不知公之籌慮如此其密建請如此其忠上之所以委任如此其專副使君之所贊佐如此其勤文武將吏之所以奔走禦侮如此其勞而功之成所以如此其不易是則不可以不書也予故為脩書之以昭示贛人庶其無忘且有考焉

移置陽明先生石刻記

昔陽明王先生督兵于贛也與學士大夫切劘於聖賢

之學自縉紳至於閭閻以及四方之過賓皆得受業問
道蓋濂洛之傳至是復明而先生治兵料敵卒有以平
奸宄者皆原於切劘之力於是深信人心本善無不可
復其不然者由倡之不力輔之不周而為學之志未立
故也既以責志為教肆其子弟復取大學中庸古本序
其大端與濂溪太極圖說聯書石于鬱孤山之上使登
覽而遊息於此者出埃壘之表動高明曠遠之志庶幾
見所書而興起其志不使至於懈惰蓋所以為倡而輔

之之慮切也先生去贛二十餘年石為風雨之所摧剥者日就缺壞而是山復為公解所拘觀者出入不便嘉靖壬寅憲副江陰薛君應登備兵之暇訪先生故迹覩斯石悲慨焉既移置于先生祠中復求翦本之善者補刻其缺壞而托記于予予嘗觀先生所書恨其學之不俱傳也自孔孟以後明其學者濂溪耳故圖說原天所以生人者本於無極而求復其原則以無欲為主舍無欲而言中正仁義皆不可以合德而反終故大學言致

知中庸言慎獨獨知之地欲所由辨求其寡而無焉此至易而難者也先生數百年之下處困而後自得恍然悔既往之非真若脫溷淖而御冷風故既自以切劘而尤不敢有隱於天下於是擇其辭書之石冀來者之自得猶夫已也今先生之言徧天下天下之人多易其言而不知其處困之功與責志之教故深於解悟者每不屑於持守而意見所至即皆自是而不疑嘵嘵然方且以議論相持競譬則石已缺壞而猶不蔽風雨顧以為

崇護之嚴貿焉莫知其所出入豈不失哉夫欲之易熾
速於風雨而志之難立有甚於石其積習之久非一日
可移置也然使精神凝聚即獨知之地以從事焉則又
不易地不由人而足以自反譬則石之摧剝於風雨者
復庇之以屢屋雖失於昔不猶可以保其終乎今石存
則升先生之堂者宜有待矣薛君有志於學其完此石
蓋亦輔世之意而余之困而不學則有愧於切劘之助
也書之石陰亦以為久要云

陽明王先生報功祠記

經世保民之道濟其變而後顯其功厚其施而後食其報傳曰太上有立德其次有立功時而至於立功則去太上遠矣士君子遭時遇主處常盡變不得已而立功固不望其報之久近人之思報自不能已故昌黎祀潮子厚祀柳張詠繪像而祀於蜀羊祜建碑而祀於襄陽其致一也贛之牙境萬山盤互羣盜縱橫土酋跳梁於東南逆藩窺伺於西北正德丙子春陽明王公以大中

丞秉鉞來鎮綱紀號令朝發夕新凡四省五道九府州
六十九縣二十五衛所之奔命者皇皇汲汲恐于後至
之誅又卓見大本廣集衆思張弛操縱不出庭戶而遙
制黠虜於江山數千里之外英聲義烈肅於雷霆今年
平南靖明年平桶岡又明年平湫頭又明年平逆藩如
虔如楚如閩如粵四郊力穡清夜絃歌而邊圉之患除
如豫州如江州如桐城如淮甸千里肅清萬夫解甲而
社稷之憂釋夫公以文儒之資生承平之世蹈踈逖之

蹤當盤錯之會天樞全斗極之光地維掃豺狼之穴璽
書頻獎茅土加封一時遭際可以風勵羣工矣公之去
贛久矣而人猶思之復建祠以祀之富者輸財貧者效
力巧思者摸像善計者糾工虛堂香火無替歲時報施
之道不於其存而於其亡身後之事未定於天下而私
於一方吾是以知贛人之重義也孔子曰斯民也三代
之所以直道而行也茲非三代之遺民歟公繼其父龍
山公之學且與孫忠烈同年同官忠烈死逆藩之難而

公成靖難之功浩然之氣充塞兩間增光皇國幸與不幸易地則皆然者然則公之立功雖有先後大小要皆以忠輸君以孝成親以信許友者歟公諱守仁字伯安別號陽明龍山公諱華以大魁冢宰孫忠烈諱燧以中丞贈宗伯皆吾鄉先達也嗚呼望雷陽而思新竹按營壘而歎奇才高山仰止景行行止謹紀其實以脩野史之拾遺云

田石平記

田江之濱有怪石焉狀若一龜卧于衍石之上長倍尋
厚廣可尋之半境土寧靜則偃卧維平有青則傾欹潛
浮以離故處故俗傳有平寧傾兵之讖歲乙酉岑氏猛
食采日殷恣橫搆兵守臣方上䟽議討一夕石忽浮去
數百武猛懼乃使力士復之嚮夕殷祀之以潜弭其變
明年大兵至猛竟失利以滅人益異焉猛黨盧王二酋
脅衆連兵據思田以重煩我師朝議特起今新建伯陽
明王公來平比至集衆告曰蠢茲二酋豈憚一擒維瘡

瘼未瘳而重罹鋒刃為可哀也即日下令解十萬之甲
掣四省之兵推赤二酋俾自善計二酋憚公威德且知
大信不殺遂率衆自縛泣降公如初令諭而遣之單車
詣田經畫建置以訓莫有衆田父老望風觀德如堵如
牆羅拜泣下曰大兵不加明公再生之賜也田醜何以
為報維田始禍石實累之具以怪狀聞且曰自王師未
旋石靡有寧田人惴惴守之如嬰今則亡是恐矣願公
毀此以寧我田公曰其然與若等往觀之既觀曰汝能

怪乎吾不汝毀而與決取筆大書其上曰田石平田州
寧千萬世鞏皇明明年春公使匠氏鐫之遂以為田鎮
田人無遠近老穉咸謳歌於道以相慶焉嗟夫維石在
阿賦性不邪孰使之行豈民之訛維妖維祥肇是興亡
天實變幻而莫知其方維邪則洩維正則滅亦存乎其
人而已矣公忠誠純正其靜一之學浩然之氣見於勤
王靖難者可以格神明而貫金石天下已信之有弗靈
於是石乎田人寶茲石文蓋不啻交人之累銅柱也已

公車將旋田人趨必東曰茲不可無述以告于世作
田石平記

陽明先生畫像記

少師徐階

陽明先生像一幅水墨寫嘉靖己亥予督學江西就士
人家摹得先生燕居像二朝衣冠像一明年庚子夏以
燕居之一贈呂生舒此幅是也先生在正德間以都御
史巡撫南贛督兵敗宸濠平定大亂拜南京兵部尚書
封新建伯其後以論學為世所忌竟奪爵予往來吉贛

間問其父老云濠之未叛也先生奉命按事福州乞歸省其親乘單舸下南昌至豐城聞變將走還幕府為討賊計而吉安太守松月伍公議適合郡又有積穀可養士因留吉安徵諸郡兵與濠戰湖中敗擒之其事皆有日月可按覆而忌者謂先生始赴濠之約後持兩端遁歸為伍所強會濠攻安慶不克乘其沮喪幸成功夫人情苟有約其敗徵未見必不遁凡攻討之事勝則侯不勝則族苟持兩端雖強之必不留武皇帝之在御也政

由嬖倖濠悉與結納至或許為內應方其崛起天下皆
不敢意其遽亡先生引兵而西留其家吉安之公署聚
新環之戒守者曰兵敗即縱火毋為賊辱嗚呼此其功
豈可謂幸成而其心事豈不皦然如日月哉忌者不與
其功足矣又舉其心事誣之甚矣小人之不樂成人善
也自古君子為小人所誣者多矣要其終必自暴白乃
予所深慨者今世士大夫高者談玄理其次為柔愿下
者直以貪黷奔競謀自利其身有一人焉出死力為國

家平定大亂而以忌厚誣之其勢不盡驅士類入於三者之途不止凡為治不患無事功患無賞罰議論者賞罰所從出也今天下漸以多事庶幾得人焉馳驅其間而平時所謂議論者如此雖在上智不以賞罰為勸懲彼其激勵中才之具不已踈乎此予所深慨也濠之亂孫許二公死於前先生平定之於後其迹不同同有功於名教江西會城孫許皆廟食而先生無祠予督學之二年始祀先生於射圃未幾被召因摹像以歸將示同

志者而首以贈呂生予嘗見人言此像於先生極似以
今觀之貌殊不武然獨以武功顯於此見儒者之作用
矣呂生誠有慕乎尚於其學求之

重修陽明王先生祠記 大學士李春芳

陽明先生祠少師存翁徐公督學江右時所創建也公
二十及第宏辭博學燦然稱首詞林一時詞林宿學皆
自以為不及而公則曰學豈文詞已也日與文莊歐陽
公窮究心學聞陽明先生良知之說而深契焉江右為

陽明先生過化地公既闡明其學以訓諸生而又謂崇祀無所不足以繫衆志乃於省城營建祠宇肖先生像祀之遴選諸生之雋茂者樂羣其中名曰龍沙會公課藝暇每以心得開示諸生而一時諸生多所興起云既公召還荐躋綸閣為上所親信蓋去江右幾三十年矣有告以祠宇傾圯者公則愀然動心捐賜金九十屬新建錢令修葺之侍御甘齋成君聞之曰此予責也遂身任其事鳩工庀材飾其所已敝增其所未備堂宇齋舍

煥然改觀不惟妥祀允稱而諸生之興起者益勃勃不可禦矣噫公當樞筦之任受心膂之寄無論幾務叢委即宸翰咨荅日三四至而猶惓惓於崇先哲興後學如此誠以學之不可以已也夫致知之學發自孔門而孟子良知之說則又發所未發陽明先生合而言之曰致良知則好善惡惡之意誠推其極家國天下可坐而理矣公篤信先生之學而日以體之身心施之政事秉鈞之初即發私餽屏貪墨示以好惡四海嚮風不數年而

人心吏治翕然丕變此豈有異術哉好善惡惡之意誠於中也故學非不明之患患不誠耳知善知惡良知具存譬之大明當天無微不照當好當惡當賞當罰當進當退錙銖不爽各當天則循其則而應之則平平蕩蕩無有作好無有作惡而天下平矣故誠而自慊則好人所好惡人所惡而為仁不誠而自欺則好人所惡惡人所好而為不仁苟為不仁生於其心害於其事蠹治戕民有不可勝言者矣公為此懼又舉明道定性識仁二

書發明其義以示海內學者而致知之學益明以切諸生能心惟其義而體諸身則於陽明先生之學幾矣業斯舍者其尚體公之意而殫力於誠以為他日致用之地哉成君守節曹州人癸丑進士按治江右飭紀布惠卓有賢聲蓋有志於學者

平寧藩事畧

敬齋蔡文

陽明先生道德功業冠絕古今無容議矣獨寧藩一事不理於讒口者有二曰始與寧府交通後知事不可成

因人之力從而剪之以成厥功又曰寧府財寶山積兵
入其宮悉取以歸此二者當時讒口嗷嗷至形諸章奏
播諸遠近縉紳有識皆知其為必無而莫悉其無之故
皆知其絕無可疑而無以破人之疑余甚恨之足跡半
天下訪之莫有知者迨移官入贛贛故先生開府之地
當時故老尚有存者咨訪累月廼得其詳於是躍然以
喜疾讒口之無根且知先生計慮之深規模之遠有非
常情之所能測識也自古建非常之功必待非常之人

逆藩之積慮非一日矣當時所憚獨先生在耳殺之不得必欲致之事乃可成故致惓惓於先生而先生亦示不絕於彼者力有所為機有所待峒酋葉芳等有衆萬人感不殺之恩樂為我用先生推誠撫之間示以意芳叩首踴躍待報而發逆藩招集無賴亦屬意於葉芳嘗以厚貲啗之芳受不卻有以聞於先生者先生憮然有失久之搏案起曰吾今日視義當為事之成敗身之禍福不計也會逆兵起遂部所屬民卒督知府邢珣伍文

定等以行葉芳密使人告曰吾以款彼也今日之事生死惟命先生大喜即攜以往鄱湖之戰逆藩覬望芳來芳乘之遂就擒大難之平芳與有力不然逆兵衆且強獨以民卒之脆弱渙散安能當其鋒哉兵入南昌先生召芳語之曰吾請於朝以官償若勞如何芳叩首曰芳土人不樂拘束願得金帛作富家翁耳遂入宮籍所有以獻餘以予芳滿其欲焉由前觀之先生所以陽示不絕於彼者陰欲有為於此使當時積穀練兵寧不啟彼

之疑而厚其毒法曰藏於九地之下奮於九天之上是也其後以貲委葉芳者則以夷治夷之法故先生心事如青天白日用兵若風雨雷霆本無可疑何疑者之紛紛也故表而出之

蔭子谷呈

正德十六年七月十八日奉到兵部鳳字二千八百八十號勘合內開一件捷音事准武選司付奉本部連送該本部題送准浙江布政司咨呈據紹興府申

據餘姚縣申蒙本府紙牌仰縣速將都御史王

承蔭子姪應該之人取具無碍親供并官吏里鄰

人等不扶結狀繳報等因依蒙行據該隅里老呂

時進等勘得右副都御史王任江西南贛等處

剿賊成功欽承蔭子一人世襲錦衣衛百戶行縣

取具里老并本族親供今據前因合將繳到王冕

等供狀一紙係本縣東北隅五里民籍有姪王守

仁任江西南贛等處右副都御史為剿賊成功欽

承蔭子王正憲世襲錦衣衛百戶行縣取具里
老并本族親供呈繳到部查得先該提督南贛
都御史王 奏稱征剿江西南贛等處賊寇驅
卒不過萬餘用費不滿三萬兩月之間俘斬六
千有奇破巢八十有四渠魁授首噍類無遺該
本部查議得都御史王 躬親督戰獲有軍功
所當先錄伏望聖明俯照節年平寇陞蔭有功
官員事例將王 照例陞職蔭子以酬其功等

因具題正德十三年四月十八日節該奉聖旨
是各官既剿賊成功地方有賴陞右副都御史
蔭子姪一人做錦衣衛世襲百戶欽此查無本
官應襲子姪姓名已經備行原籍官司查取去
後又該提督南贛軍務右副都御史王 奏報
廣東韶州府樂昌等縣平賊捷音內開擒斬首
從賊人首級共二千八百九名顆俘獲賊屬并
奪回被虜男婦五百名口等因該本部查議得

本官分兵設策一旦剿平厥功非細本部議將
王量加陞級於先蔭子百戶上再加陞蔭以
酬其功伏蒙欽依王守仁已因功陞職還賞銀
四十兩紵絲二表裏臣等以為王守仁累建奇
功各不相掩今止給賞似不足酬其功合無王
守仁量陞俸給於先蔭子百戶上量加陞蔭等
因本年十二月初三日具題本月二十六日奉
聖旨王守仁累有成功他男先蔭職事上還加

陞一級欽此又經備行欽遵訖今據前因久查
陞級事例實授百戶上加一級該副千戶通查
案呈到部欲將都御史王應蔭子王正憲查
照先奉欽依加蔭子姪一人做錦衣衛世襲百
戶再加續奉欽依加陞一級與做副千戶填註
錦衣衛左所支俸緣係查錄恩蔭節奉欽依王
守仁蔭子姪一人做錦衣衛世襲百戶及他男
先蔭職上還加陞一級事理等因正德十五年

三月初四日少師兼太子太師本部尚書王
等具題次年四月二十五日奉聖旨是欽此欽
遵擬合通行為此合行浙江布政司轉行紹興
府餘姚縣著落當該官吏照依本部題奉欽依
內事理即便查取王正憲作速起程前來赴任
仍將本官起程日期繳報施行

處分家務題冊

門人黃宗明書

先師陽明先生夫人諸氏諸無出先生立從姪

正憲為繼嘉靖丙戌繼室張氏生子名正聰未
及一歲輒有兩廣之命當將大小家務處分詳
明托人經理歿幾一載家衆童僕不能遵守在
他日能保無悔乎宗明等因送先生葬回太夫
人及親疎宗族子弟四方門人俱在將先生一
應所遺家務逐一稟請太夫人與衆人從長計
處分析區畫以為閑家正始防微杜漸之原寫
立一樣五本請於按察司僉事王紹興府知府

洪用印鈐記一本留府一本留太夫人正憲正聰
各留一本同志一本永為照守先生功在社稷澤被
生民道在宇宙人所瞻仰其遺孤嫠室識與不識無
不哀痛況骨肉親戚門生故舊何忍棄之負之哉凡
我同事自今處分之後如有異議人得舉正毋或輕
貸

同門輪年撫孤題單

門人薛侃書

先師陽明先生同祖兄弟五人伯父之子曰守義守智

叔父之子曰守禮守信守恭同父兄弟四人長為先師
次守儉守文守章先師年逾四十未有嗣子擇守信第
五男正憲為嗣撫育婚娶嘉靖丙戌生子正聰明年奉
命之廣身入瘴鄉削平反亂遂嬰奇疾卒於江西之南
安凡百家務雖預處分而家衆欺正聰年幼不知遵守
吾儕自十里會葬痛思先師平生憂君體國拳拳與人
為善之心今日之事宜以保孤安寡為先區區田業非
其所重若後人不體見小失大甚非所以承先志也乃

稟太夫人及宗族同門戚里僉事汪克章太守朱表酌
之情禮叅以律令恤遺孤以弘本嚴內外以別嫌分爨
食以防微一應所有會衆分析具有成議日後倘復恩
典承襲亦有成法正聰年幼家事立親人管理每年輪
取同志二人無同扶助諸叔姪不得叅撓為兄者務以
總家愛弟為心以副恩育付托之重為弟者務以嗣宗
愛兄為心以盡繼志述事之美為旁親者亦願公心扶
植孤寡以為家門之光則先師在天之靈庶乎其少慰

矣倘有踈虞執此聞官輪年之友亦具報四方同門咸
為轉達明有憲典幽有師靈尚冀不棄所有條宜開具
於後

請恤典贈謚疏

禮科等科都給事中等官辛自修等題為開讀事伏覩
詔書內一款近年病故大臣有應得恤典而未得亦有
不應得而得者科道官舉奏定奪欽此臣等公同面議
舉得大學士楊廷和蔣冕石瑤尚書王守仁王廷相毛

澄汪俊喬宇梁材湛若水喻茂堅劉訥聶豹侍郎呂柟
周廣江曉程文德少詹事王偉祭酒王雲鳳魏校鄒守
益二十一人奇勲大節茂著於生前令望高風愈隆於
身後俱應得恤典而未得者中間如呂柟有祭葬而無
謚石瑤有謚而不足以盡其平生俱應改擬補賜又訪
得文臣中如曾銑楊守謙商大節程鵬朱方張漢王梟
孫繼魯八人或志在立功身遭重辟或事存體國罪累
流亡至今無問知與不知皆痛惜之臣等仰惟恩詔既

恤得罪之臣復舉原終之典而諸臣獨以一時負罪遂不得沾被洪慈人心咸為憫惻似應查復原官量加優恤以示褒答等因奉聖旨禮部看議來說欽此

浙江等道監察御史王 等題為開讀事伏覩詔書內一欵近年病故大臣有應得恤典而未得亦有不應得而得者科道官舉奏定奪欽此欽遵臣等脩行禮部祠祭司查取節年給過大臣恤典并有請未給緣由隨行浙江等道各公舉所知以奉明詔續行祠祭司及各道

手本開具各臣前來臣等逐一會同詳議舉得原任大學士楊廷和蔣冕石瑤尚書王守仁王廷相湛若水毛澄汪俊喬宇梁材喻茂堅劉詵聶豹侍郎呂柟周廣江曉程文德少詹事黃佐祭酒魏校王雲鳳鄒守益等即其立朝則大節不虧邇其居身則制行無議公是在人不容泯沒俱應得恤典而未得者也中間如呂柟雖有恤典而未得贈謚石瑤已有贈謚而未盡其人似應得補賜改擬者也又查得節年給過恤典如尚書邵元節

陶仲文顧可學徐可成甘為霖侍郎郭文英張電朱隆
僖等或穢跡昭彰人所共指或雜流冒濫法所不容俱
不應得而得者也伏望敕下該部再加詳議將楊廷和
王守仁等應復官廕者復其官廕仍給祭葬贈謚呂柟
准賜贈謚以成恩禮石瑤如法改擬以符名實其濫叨
恩典如邵元節陶仲文先經刑部議處外其顧可學等
均為冒濫名器可惜合當追奪以昭明法者也再照錄
忠恤罪聖朝厚下之典也觀過而知仁明主鑒物之公

也臣等又訪得如文臣之中如曾銑楊守謙商大節翟鵬朱方張漢王杲孫繼魯等究其罹禍之迹原其為國之忠生則未雪死而益明武臣之中如周尚文者出謀宣力功在邊疆恤典未給人心稱屈茲當聖仁湛濡之時正煩寬洗濯之會諸臣之恤典似當應給以廣殊恩者也再乞勅下該部一并酌議請自上裁仍通行各該撫按遵照詔書廣求博訪凡大臣恤典果有應得而未得及不應得者各宜悉心甄別以宣上德亦不得曲意

狗物濫及庸劣庶幾恩之所敷潜晦不遺義之所抑回
慝莫逃勸懲之典行而風世之道脩矣等因奉聖旨禮
部看議來說欽此

辯明功罰疏

南京戶科給事中岑用賓一本開讀事臣惟國家之禮
大臣其生也固重其爵祿以寵異之其歿也亦必優其
恤典以旌褒之所以示君臣一體之義終始存歿無間
也然是恩寵之澤予奪出自朝廷之上忠良之臣固在

所必加其匪人惡德亦不使得以倖及焉蓋加於忠良則為公及於匪人則為僭公而不僭則君子以勸小人以懲此固人君奉天而不私而實默寓勸懲之機於其間也臣伏讀陛下登極之詔內一款有曰一近年病故大臣有應得恤典而未得亦有不應得而得者科道官舉奏定奪欽此臣有以仰見皇上之新政固將欲使朝廷恩寵之大典昭大公於天下萬世也臣備員南垣敢不祇承德意哉臣謹諮之縉紳叅之聞見查得已故原

任刑部尚書林俊福建興化府莆田縣人舉成化戊戌
科進士歷官四十餘年屢陳讜言忠誠剴切抗犯顏敢
諫之節尚簡素清約之風迭仆迭起朝野推重在四川
則撫劉藍鄙之劇寇在江西則裁制寧藩之逆萌功尤
不泯暮年遭際保終完名居家構疾具疏預辭身後恤
典竟為不合者所忌乘機排阻至今公論惜之已故原
任南京兵部尚書新建伯王守仁浙江紹興府餘姚縣
人舉弘治己未科進士筮仕三十餘年敷歷中外所至

有聲而討江西宸濠之叛平廣西思恩田州及斷藤八寨之賊功烈尤著且博極經史究心理學倡明良知之訓洞暢本源至今為人士所宗不幸其歿也遽為忌者䟽論遂削去伯爵并恤典贈謚迄今人以為恨已故原任南京兵部尚書湛若水廣東廣州府增城縣人舉弘治乙丑科進士歷官三十餘年立朝正大重厚有休休有容之風治事經緯詳明有濟世匡時之畧尤倡明正學以接引後進為已任自始至終孜孜不倦凡所造就

多為時名流致仕家居逾二十載壽考而終其子孫曾
陳乞恤典贈謚未蒙先帝俞允至今衆論咸以為歉已
故原任南京工部尚書吳廷舉廣西橫州府千戶所人
舉成化丁未科進士歷官四十餘年機畧優長節操素
勵犯逆瑾之怒而剛正不回諭桃源之寇而誠信久布
且始終一介不取歿後殯殮無資廉潔高風古今鮮儷
訪其贈謚尚亦未與云已故原任戶部侍郎唐胄廣東
瓊州府瓊山縣人舉弘治壬戌科進士歷官四十餘年

始終正直不少變易迭任藩臬巡撫勞伐最多在部建
議陳言忠讜更切後以忤旨被杖削籍衆皆避之昨吏
部題請雖以復職贈官而祭墓并謚未議猶為缺典以
上五臣其任職先後雖稍不同而負忠良重望則無二
致明詔所謂應得恤典而未得者此其最也又查得已
故原任禮部尚書顧可學其先後居官臣無暇論已獨
其晚年挾持邪淫誕術干求進用因而濫叨恩賞穢濁
清曹迄今輿論咸羞稱之其始而鍊合秋石繼而鍊製

紅鉛妄行進御至使方士人等踵跡效尤皇上所謂王金陶做等妄進藥物致損聖躬臣愚以為若誅求首惡則顧可學尤不容逭矣其存日既倖逃刑憲不與方士人等同就誅夷則其死也寧可復使之冒濫朝廷恩賚于泉下也哉明詔所謂有不應得而得者此誠其最也夫表揚善類則天下皆知為善之利排斥姦諛則天下皆知肆惡之非乃治世所不容緩者伏乞勅下該部查議如果臣言不謬即將林俊王守仁湛若水吳廷舉唐

胄五臣查照舊例一體追補贈謚祭葬廕子等項顧可
學前後所冒官職贈廕等項盡行削奪其王守仁伯爵
應否承襲并行集議題請取自上裁如此庶乎予奪明
而恩威不忒賞罰當而勸懲以昭矣再照臣子冤抑久
當獲伸殊恩濫竊終宜釐正如已故原任吏部尚書李
默生平博雅能文清修鯁介居官守職茂著風猷止緣
人柄銓曹不阿權勢遂致姦人乘風望旨竟爾擠排含
冤囹圄齎志而死今際遇昌時彼泉壤之下寧無昭雪

之望乎已故原任江西副使汪一中在昔統兵征剿始而無料敵之明繼而無禦敵之策坐使狂寇冲突命殞兵殲較之守備不設誠為一律倘若憫其死事姑不追論存其官職猶或可也乃隆忠贈廕崇之貌祀其為冒濫不已甚乎當時與一中同事者僉事王應時也應時被虜贖回尋冒陞秩旋被叅論落職觀應時不當冒陞則一中不應贈廕明矣再乞勅下該部查議將李默一臣比照遺詔恤錄之典復其官職加之贈祭少雪冤魂

將一中一臣遵照明詔不當得之旨奪其贈廕祠祀俾
毋終辱明典則予奪益彰而淑慝益著未必不為聖朝
平明之治少裨也奉聖旨該部知道

請從祀疏

欽差提督學校巡按直隸監察御史耿定向謹題為
應明詔乞褒殊勲以光聖治事恭惟皇上御極之初詔
下中外揆剔幽滯恤錄往忠鼓勳寰宇凡有血氣者靡
不競勸矣伏思原封新建伯南京兵部尚書王守仁者

雖經科臣列舉題請顧其功在社稷道啟羣蒙是猶未
可以槩凡論也臣敢特為陛下言之臣伏聞武宗初年
舊邸宦官有馬永成劉瑾等時號八虎置造淫巧蠱惑
上心日進走馬飛鷹導為娛樂不令親近儒臣講學修
德耽廢萬幾時科道官諫不聽戶部尚書韓文泣血苦
諫不聽左右輔臣時時密諫不聽以致海內洶洶思亂
盜賊蜂起天下騷動江藩宸濠由此乘機竊發謀危宗
社時非守仁在贛倡義擒滅今日之域中殆有不忍言

者矣此其功在國論章章較著人所共明也及宸濠既擒太監張忠及許泰等復又誘惑武宗以親征為名巡幸南都其實陰懷異志欲逞不軌時宗社之危益如累卵矣全賴守仁握兵上游隨機運變各惡潛自震懾武宗因得還京厚終於以啟先皇帝逮我皇上今日萬世無疆之業此其功甚鉅而為力尤難其迹則甚隱矣至其倡明道術默贊化理未易言述即舉所著拔本塞源一論開示人心尤為明切如使中外大小臣工實是體

究則所以翊我皇上太平無疆之治者尤非淺小此其
功則百千世可頌者也在昔先皇帝入繼大統首議錫
爵進秩遣官存問即欲召入密勿以容啟沃維時輔臣
桂萼者妬其軋已陰肆擠排故薦令督師兩廣竟使賁
志以歿尋復構煽致削封爵智士忠臣至今扼腕悼嘆
而不置矣伏惟皇上俯垂軫念勅下廷臣虛心集議特
賜復爵贈諡從祀孔廟萬代瞻仰甚盛舉也臣竊又伏
思為此請在國家詔功勳典當如此耳乃若篤忠效知

之臣其心惟願國家永靈長之慶而不願有建功之賞
惟願朝端協一德之交而不樂有倡道之名伏惟皇上
省覽及此深惟往事之鑒益弘保泰之圖而左右臣工
共明一體之學頓消有我之私則守仁之道即已表章
於今日而守仁之志即已獲伸於九原矣即令奕世罔
窮永言銷滅亦其所安此守仁之心亦微臣之心也臣
無任祝望激切隕越之至為此專差舍人丁憲賁捧謹
題請旨奉聖旨禮部知道

題贈諡疏

吏部一本為開讀等事節該本部驗封清吏司案呈奉本部送准禮部咨該科道等官會舉已故原任新建伯南京兵部尚書兼都察院左都御史王守仁等官各應得恤典等因除祭葬照例給與外據贈官脩咨前來本部俱經照例題奉欽依外准吏部咨該翰林院接出揭帖某人等因開咨送司案呈到部查得贈諡官員例應給與誥命本部欲行翰林院撰文中書舍人關軸書寫

臣等未敢擅便開坐謹題請旨計撰述官

闕

員誥命

闕

軸 原任新建伯南京兵部尚書兼都察院左都御史

王守仁今贈新建侯諡文成 原任少師兼太子太師

吏部尚書華蓋殿大學士楊廷和今贈太保諡文忠

原任少傅兼太子太傅戶部尚書謹身殿大學士蔣冕

今贈少師諡文定 原任太子太保吏部尚書兼武英

殿大學士石瑤今贈少保 原任少保兼太子太保吏

部尚書喬宇今贈少傅諡莊簡 原任太子太保兵部

尚書兼都察院左都御史王廷相今贈少保諡肅敏

原任太子太保兵部尚書聶豹今贈少保諡貞襄 原

任太子太保兵部尚書彭澤今贈少保諡襄毅 原任

太子少保戶部尚書王杲今贈少保 原任太子少保

戶部尚書梁材今贈太子太保諡端肅 原任禮部尚

書汪俊今贈太子少保諡文莊 原任刑部尚書喻茂

堅今贈太子少保 原任刑部尚書劉訥今贈太子少

保 原任刑部尚書林俊今贈太子少保諡貞肅 原

任南京工部尚書吳廷舉今贈太子少保諡清惠 原

任南京兵部尚書湛若水今贈太子少保 原任兵部

左侍郎張漢今贈兵部尚書 原任南京工部左侍郎

程文德今贈禮部尚書 原任南京工部左侍郎何孟

春今贈禮部尚書諡文簡 原任南京禮部右侍郎呂

柟今贈禮部尚書諡文簡 原任兵部右侍郎兼都察

院左副都御史曾銑今贈兵部尚書諡襄愍 原任兵

部右侍郎兼都察院右副都御史楊守謙今贈兵部尚

書謚恪愍 原任兵部右侍郎兼都察院右僉都御史

商大節今贈兵部尚書謚端愍 原任南京刑部右侍

郎江曉今贈工部尚書 原任都察院右副都御史孫

繼魯今贈兵部左侍郎謚清愍 原任詹事府少詹事

兼翰林院侍讀學士黃佐今贈禮部右侍郎 原任都

察院右僉都御史朱方今贈都察院右副都御史 原

任南京國子監祭酒鄒守益今贈禮部右侍郎謚文莊

原任刑部左侍郎劉玉今贈刑部尚書謚端毅 原

任太子太保吏部尚書熊浹今贈少保諡恭肅 原任
太僕寺卿楊勗今贈右副都御史諡忠節 原任左春
坊左贊善羅洪先今贈光祿寺少卿諡文恭 原任兵
部員外郎楊繼盛今贈太常寺少卿諡忠愍

題遣官造墓照會

工部為開讀事書填堂字一千八百二十號勘合照會浙
江布政司仰比號相同照依後開事件作速完報施行
須至照會者計開一件開讀事屯田清吏司奉本部連

送該本部題本司案呈奉本部送准禮部咨該禮科等
科都給事中等官辛自脩等題前事該本部看得大學
士蔣冕性行朴忠學識雅正當武廟南巡之日而協謀
靖亂共成康定之功遇先皇繼統之初而秉正立朝克
效贊襄之職乞身遠引似得進退之宜潔已令終無損
平生之譽新建伯兵部尚書王守仁具文武之全才闡
聖賢之絕學筮官郎署而抗疏以犯中璫甘受炎荒之
謫建臺江右而提兵以平巨逆親收社稷之功偉節奇

勲久已見推於輿論封盟恤典豈宜遽奪於身終尚書
汪俊秉剛介之性持廉慎之操筮仕詞林而再蹶復起
生平之制行可知繼司邦禮而百折不回立朝之節概
具見潔已無慚於古道歸田見重於鄉評尚書喬宇才
猷博達德量宏深預計伐叛濠之謀而留都賴之以不
聳持法落逆彬之膽而奸萌藉此以潛消入掌銓衡公
明懋著晚歸田里譽望彌隆左都督周尚文志本忠勤
才尤清耿深謀秘畧克成保障於雲中銳幹強才久震

威名於閭外近年良將在所首稱身後恤典委難報罷
以上諸臣論其職任才猷不無差等之別要其官常人
品均為賢碩之儔所當厚加恤典以優異者也尚書喻
茂堅歷官中外積有年勞守已始終並無訾論尚書王
杲持身清慎任事剛方謫死本為非罪大節委有可嘉
以上二臣所當照例給與祭葬者也相應題請合無將
大學士蔣冕尚書喬宇左都督周尚文各照例與祭九
壇新建伯王守仁與祭七壇尚書汪俊與祭二壇尚書

喻茂堅與祭二壇尚書王杲與祭四壇移咨工部照依品級造墳安葬及行各該布政使脩辦祭物香燭紙就遣本司堂上官致祭等因題奉聖旨蔣冕喬宇周尚文王守仁汪俊各照例與祭葬還同呂柟俱與他謚石瑤准改謚其餘都依擬行欽此欽遵咨部送司查得先該本部為審時省禮以寬民力事議得病故大臣照依今定後開價值轉行有司措辦給付喪家自行造葬不必差官中間果有功德昭彰聞望素著公私無過或曾歷

邊務建立奇功及經帷纂修效勞年久此等官員合照舊例差官造墓俱聽本部臨時斟酌奏請定奪等因題奉武宗皇帝聖旨是造墳開壙工料價銀則例准擬欽此已經通行欽遵去後今該前因通查案呈到部看得大學士蔣冕尚書喬宇王守仁汪俊喻茂堅王杲都督周尚文俱功德昭彰聞望素著及效勞經帷纂修并建立邊功俱應差官造墓查得本部司屬官員各有差占及查見今行人司并中書等衙門俱缺官不敷委用合

候命下之日容職等查順便省分行移事簡衙門查有
應差官員或一人兼差二三省本部照例各給批文定
限仍行兵部應付各官前去各該布政司比號相同着
落當該官吏照依後開擬定價值派辦各該布政司仍
委堂上官一員會同本部委官前去造墳處所依式造
墓各畢日脩將夫匠價銀數目各該布政司類造黃冊
奏繳青冊送部查考等因隆慶元年六月初八日少傅
本部尚書雷 等具題本月初十日奉聖旨是欽此欽

遵擬合通行為此合連送司仰類行各該布政司著落
當該官吏照依本部題奉欽依內事例欽遵造塋施行
等因連送到司各付前去類填施行計開浙江布政司
派辦已故原任新建伯兼南京兵部尚書王守仁係京
二品文官造墳工料價銀二百五十兩夫匠一百五十
名每名出銀一兩通共該銀四百兩正右照會浙江等
處承宣布政司准此隆慶元年六月十七日對同都
吏王宜開讀事右照會浙江布政司當堂開拆

祭葬劄付

浙江等處承宣布政使司為開讀事禮房准戶部勘合
科付承准禮部以字四十二百五十二號勘合照會前
事准祠祭清吏司付奉本部連送該本部題本司案呈
奉本部送禮科都給事中等官辛自修等題欽奉詔書
內一款近年病故大臣有應得恤典而未得亦有不應
得而得者科道官舉奏定奪欽此臣等會同科道官復
加詢訪公同面議舉得尚書王守仁奇勲大節茂著於

生前令望高風愈隆於身後應得恤典而未得者伏乞
勅下該部再加查議如果恤典未給將王守仁應復官
廕者先復其官廕仍給以祭葬贈諡等因奉聖旨禮部
看議來說欽此欽遵抄出送司行准吏部文選清吏司
回稱王守仁原任新建伯兼南京兵部尚書及准考功
清吏司手本回稱王守仁病故各回報到司查得大明
會典并見行事例文官見任并致仕者二品病故祭二
壇又查得凡伯爵管事有軍功者祭七壇工部造墳安

莖又查得先為比例之恩贈諡事節奉孝宗皇帝聖旨
今後有乞恩贈的恁部裏還要斟酌可否來說務合公
論不許一槩徇情比例濫請該科記着欽此今該前因
案呈到部看得恤典一節朝廷所以崇獎賢哲褒簒
勞表章於既往激勸於將來其典至重其法至嚴者也
若使有當得而不得有不應得而濫得者又何以示教
戒於天下而公是非於後世耶茲者躬遇我皇上嗣承
大統典禮鼎新正人心爭自濯磨之始而明詔所及特

開釐正恤典一款言官奉詔諮詢陳列上請無非祇承
明命以公勸懲之意相應議擬為照新建伯兵部尚書
王守仁具文武之全才闡聖賢之絕學筮官郎署而抗
疏以犯中璫甘受炎荒之謫建臺江右而提兵以平巨
逆親收社稷之功偉節奇勲久已見推於輿論封盟恤
典豈宜遽奪於身終所當厚加恤典以示優異者也臣
等參稽公論查照事例明白相應題請合無將新建伯
王守仁與祭七壇照依品級造塋仍乞賜諡易名以表

潛懿其爵廕移咨吏部查議外合候命下行翰林院撰祭文并擬諡號工部差官造墳安塋及行該布政司買辦祭物香燭紙就遣本布政司堂上官致祭恩典出自朝廷臣等不敢定擬伏乞聖裁等因隆慶元年四月二十七日日本部尚書兼翰林院學士高等具題二十九日節奉聖旨王守仁照例與祭奠還與他諡欽此欽遵擬合就行為此合就連送仰付該司類行浙江布政司轉屬支給官錢買辦祭物香燭紙就遣本布政司堂上

官致祭仍將用過官錢開報戶部知數毋得因而科擾
不便連送到司合付前去煩為類填施行等因到司案
呈到部擬合就行浙江布政司照依勘合內事理一體
遵奉施行等因脩承移付准此擬合就行為此除外劄
付本官照劄脩承照會內事理即便轉行該縣支給官
錢買辦祭物香燭紙完脩擇日申請本司分守該道親
詣致祭施行畢日將用過官錢行過日期明開動支何
項銀數脩造青黃文冊三本申報以憑轉繳施行毋得

違錯不便須至劄付者

諭祭文

維隆慶年月日皇帝遣本布政司堂上某官某諭祭原
任新建伯兼兵部尚書贈新建侯王守仁文曰惟卿學
達天人才無文武拜官郎署抗疏以斥權奸擁節江西
仗義而討凶逆笑夷大難茂著奇勲又能倡絕學於將
湮振斯文於不墜豈獨先朝之名佐實為當代之真儒
顧公評未定於生前致恤典尚缺於身後朕茲嗣統特

用頒恩爵陟侯封申錫酬功之命謚加美號庸彰節惠
之公冥漠有知英靈斯烈

首七等文

曰惟卿學探洙泗之奧才為管葛之儔直節著於立朝
奇功収於定難德既茂矣勲莫尚焉方膺顯命以貤榮
遽罹讒言而褫爵公評殊快恩寵特加首七莫追載頒
諭祭服茲明渥用慰幽靈終七百日文同但改首七為
終七又改終七為百日

下葬等文

曰惟卿學問閎淵謀猷敏練接千載聖賢之正脉建萬
年社稷之奇功久被浮言莫伸國是雖爵隨身廢而名
與道存茲當窆之期用賁幽泉之寵歆茲爨典將爾
忠魂朞年除服文同但改窆為周朞又改為禪除
一祭品

猪一口 羊一羖 饅頭五分 粉湯五分 果

子五色 每色按酒五盤 鳳雞一隻 燂骨一塊

燂魚一尾 酥餅酥餛各四箇 湯雞一分 湯魚一

分 降真香一炷 燭一對重一斤 焚祝紙一百張 酒

二瓶

右劄付紹興府准此入遞不差人隆慶二年二月十三日對同通吏朱椿開讀事十四日申時發行紹興府劄付押十六日到府

江西奏復封爵咨

任士憑

欽差巡撫江西等處地方兼理軍務兵部右侍郎兼都

察院右僉都御史任 為開讀事據江西布政司呈奉
職按驗准吏部咨前事內開會同巡按御史即查新建
伯王守仁當宸濠倡亂之時仗義勤王奮身率衆中間
分兵遣將料敵設謀斬獲功次擒縛渠魁等項是否的
有實蹟可據地方蕩平後其民情果否誦功爵蔭削除
以來羣情果否稱枉縱果否准其子孫世襲逐一條
查明白作速作主施行等因脩咨前來案行本司會
同司道查議詳報并蒙巡按江西監察御史蘇 案驗

奉都察院勘劄同前事依奉行據南昌府呈據南昌縣
申稱故牒府縣儒學師生及喚通縣耆民坊里陳一鳴
等并質之鄉宦原任侍郎等官魯鈞丁以忠劉伯躍胡
植等逐一查結得宸濠陰謀不軌已將十年蓄養死士
招集盜賊一旦舉事勢焰燠灼於時本爵方任南贛都
御史往閩勘事正德十四年六月十五日行至豐城聞
變即旋吉安督率知府伍文定等調集軍民兵快約會
該府鄉官王懋中等相與激發忠義移檄遠近暴揚逆

濠罪惡於是豪傑響應人始思奮士民知有所恃而壯
膽逆黨知有所畏而落魄夫本爵官非守土而討逆之
命又未下一旦舉大事定大謀此非忠憤激切克惇大
義者不能也至七月初二日逆濠留兵萬餘守江西省
城而自引兵向闕本爵晝夜促兵十五日會臨江之樟
樹十八日分布督遣知府伍文定等攻廣閤七門二十
二日破賊盡擒逆惡二十四日逼黃家渡二十六日逆
濠就擒不延時日江省底定此非謀略素定料敵若神

者不能也夫逆濠一大變也以六月十四日起事以七月二十六日蕩平兵不血刃民不易市即本爵之勲烈誠與開國同稱迨先帝登極大定公典論江西首功封本爵為新建伯給券世襲此固報功之盛典而江右咸稱快焉繼因平蠻病故朝議南寧之事霍韜黃綰諸臣奏疏甚明竟扼於衆忌而天下咸稱枉焉邇者為開讀事科道等官疏欲復其世襲此公道之在人心不容泯也昔開國文臣劉基以武功封誠意伯停襲百餘年嘉

靖初特取其的裔世襲夫本爵學貫天人才兼文武忠
揭日月功維社稷恩庇生民擬之劉誠意不相伯仲儻
蒙覆奏准其世襲扶植崇德報功之公道興起忠臣義
士之世教等因并據本縣儒學生員王緝等結報相同
備申本府轉申到司據此隨該本司左布政使曹三暘
右布政使程瑤會同按察使張柱都司署都指揮僉事
耿文光分守南昌道左叅政方弘靜分巡南昌道僉事
嚴大紀會看得原封新建伯王守仁正德十四年督撫

南贛之時於六月初九日自贛起行往福建勘事時宸濠謀為不軌欲圖社稷本月十四日擅殺都御史孫燧副使許逵并執縛都布按三司官及府縣等衙門大小官員俱囚之盡收在城各衙門印信及搬搶各庫藏一空釋放在城各司府縣見監重囚舟楫蔽江而下聲言直取南京次日本爵在於豐城舟中聞變疾趨吉安集兵勤王行至中途尤恐兵力未集若宸濠連出難以遽支乃間諜揚言朝廷先知寧府將叛行令兩廣湖襄都

御史楊旦秦金准兵部咨調遣各處兵馬暗伏要害地方以伺寧府兵出襲殺復取優人數輩將公文各縫衣絮中各與數百金以全其家令其至伏兵處所飛報竊發日期將發間又捕捉偽太師李士實家屬至舟尾令其覘知本爵佯怒令牽之上岸處斬已而故縱之令其奔報宸濠邏獲優人果於衣絮中搜得公文宸濠遂疑懼不敢即發十八日至吉安督率本府知府伍文定臨江知府戴德孺贛州知府邢珣袁州知府徐璉等調集

軍民召募義勇會計一應解留錢糧支給糧餉造作戰
船奏留公差回任御史謝源伍希儒分職任事約會致
仕養病丁憂閒住及赴部調用等項一應鄉官相與激
勸忠義曉諭禍福又恐宸濠知其調度覺其間諜發兵
速出乃密使偽國師劉養正家屬及平日與宸濠往來
鄉官陰致歸附之意以緩其出直伺調度已定乃移檄
遠近宣布朝廷威惠暴露宸濠罪惡又度兵家決勝之
機不宜急冲其鋒須先復省城搗其巢穴賊聞必回兵

來援則出兵邀而擊之此全勝之策於是佯示以自守
不出之計七月初二日宸濠留兵萬餘使守江西省城
乃自引兵向安慶本爵探知其出遂星馳促各府兵期
以本月十五日會於臨江之樟樹鎮身督知府伍文定
等兵徑下戴德孺等兵各依期奔集十八日遂至豐城
分布哨道約會齊攻省城廣潤等七門是日又探得宸
濠伏兵於新舊墳廠以備省城之援乃密遣兵從間道
襲破之以揺城中十九日發市汧二十日各兵俱至信

地我師鼓噪並進梯絙而登一時七門齊入城遂破擒
其居守宜春王拱條及偽太監萬銳等千餘人宸濠宮
中眷屬縱火自焚遂封府庫搜出原收大小衙門印信
九十六顆先上江西捷音疏仍分兵四路追躡宸濠攻
圍安慶未下至是果解圍歸援省城卒如本爵所料於
是議禦寇之策本爵斷以宜先出銳卒乘其惰歸邀擊
以挫其鋒衆將不戰而自潰遂遣知府伍文定等分道
並進擊其不意奮死殊戰賊大潰因榜諭城中軍民雖

嘗受賊官爵能逃歸者皆免死能斬賊徒歸降者皆給
賞使內外居民及嚮導人四路傳布以解散其黨二十
三日宸濠先鋒至樵舍風帆蔽江本爵親督伍文定等
四面分布以張其勢二十四日賊逼黃家渡乃合兵交
擊噪呼並進賊大潰而奔擒斬二千餘級落水死者以
萬數賊氣大沮退保八字腦二十五日伍文定等奮督
各兵並進砲及宸濠舟賊又大潰擒斬二千餘級溺水
死者莫計其數乃夜督伍文定等為火攻之具邢珣等

分兵四伏期火發而合二十六日宸濠方召羣臣責其間不致死力者將引出斬之爭論未決我兵已四面而集火及宸濠副舟衆遂奔散宸濠與妃泣別宮人皆赴水死宸濠并其母子郡王將軍儀賓及偽太師國師元帥叅贊尚書都督都指揮千百戶等官數百人皆就擒矣擒斬賊黨凡三千餘級落水死者約三萬餘所棄衣甲噐仗財物與浮尸積聚橫亘若洲餘賊數百艘四散逃潰二十七日復遣官分兵追剿殆盡計先後擒斬首

從賊人賊級并獲宮人賊屬奪回被脅被虜招撫畏服
官民男婦等項共一萬一千五百九十六名顆口功成
而事定矣先是本爵起兵吉安時兩上疏乞命將出師
蒙朝廷差安遠伯朱泰即許泰平虜伯朱彬即江彬左
都督朱翬即劉翬太監張忠張永等為總督軍務贊畫
機密等官體勘宸濠叛逆事情前往江西至中途聞宸
濠受擒報捷至京計欲奪功乃密請駕親征江彬許奏
等乃倡言本爵始同宸濠謀叛因見天兵親討始擒宸

濠以功脫罪欲併擒本爵以為已功又諭本爵欲將宸
濠放至城中待駕至列陣重擒本爵不可遂各引兵至
南京候駕本爵乃力疏請止親征九月十一日親自諒
帶官軍將宸濠并宮眷逆情重犯督解赴闕扶病前進
行至浙江杭州府又遇欽差太監張永齎駕帖開稱宸
濠等待親臨地方覆審明白具奏定奪本爵遂按行浙
江按察司轉呈太監張永會同監軍御史公同該省都
布按三司等官將見解逆首宸濠并宮眷等項逐一交

付明白轉解於是江彬等日夕謀欲奪功欲反坐本爵并擒為功賴張永極力辯護得免時本爵功高望重頗為當路所忌正德十六年十二月內該部題為捷音事議封以伯爵給與誥券子孫世世承襲賜勅遣官獎勞錫以銀幣犒以羊酒封新建伯奉天翊運推誠宣力守正文臣特進光祿大夫柱國兼南京兵部尚書叅贊機務歲支祿米一千石三代并妻一體追封本爵累疏辭免明年嘉靖改元本爵丁父憂四方來游其門講學益

衆科道官迎當路意劾公偽學服闋例該起復六年不
召江西輔臣有私憾本爵者密為進讒以阻其進嘉靖
六年廣西岑猛倡亂兵部論薦本爵總督四省軍務前
去蕩平又成大功時本部力叅其擅離職役及叅其處
置廣西思田八寨事恩威倒置又詆其擒宸濠時軍功
冒濫乞命多官會議明年江西輔臣復進密揭命多官
會議遂削世襲伯爵并當行恤典皆不沾被矣等因到
職據此卷查先准吏部咨前事已經案行該司會同查

議去後今據前因該職會同巡按江西監察御史蘇朝宗叅看得原任新建伯王守仁當宸濠叛逆之日正督撫南贛之時宸濠之未發也若非勦平洴頭等巢則勇智絕倫之徒皆為賊所用必大肆蔓延之禍及宸濠之既發也若非行間以緩其出則四方大兵之衆非朝夕可集必難為撲滅之功督伍文定督戴德孺督邢珣等飽歌協力足見分兵遣將之能係省城係黃家渡係樵舍決勝若神信有料敵設謀之智斬獲功次具載於紀功

之冊而擒縛渠魁甚明於交割之文且奮身率衆之勞
皆歷歷可據仗義勤王之舉尚昭在人先與後擒乃
濠黨利己之誣本不足辯而其中原以北終不能攻陷
金陵以據者要皆本爵至微之謀論之今日江西死節
皆蒙贈恤生存皆獲撫安孰非本爵勤勞之舉地方蕩
平之後誦功者載在口碑爵廕削除以來稱枉者孚於
士論蓋較之開國元勳若非同事而擬其奠安社稷則
與同功但世襲之典事體重大出自朝廷非臣下所敢

輕議為此除具題外今脩前由理合移咨貴部煩請查照施行須至咨者右咨吏部隆慶元年十月十一日行說堂十一月十三日到

浙江巡撫奏復封爵疏

王得春

巡按浙江監察御史王 題為懇乞鑒忠義復襲爵以光聖政事臣惟人臣報國之忠致身之義雖得之天性然其所以鼓舞而激勵之者實賴君父在上有以握其機也臣會同提督軍門趙 竊見原任新建伯王守仁

為浙江餘姚人方正德己卯寧庶人宸濠謀反時守仁
以南贛巡撫提督軍務奉旨前往福建勘處叛軍道經
豐城聞變乃潛回吉安遂與知府伍文定等誓死討賊
當是時也宸濠以數十年逆謀發之一旦遠邇駭震內
而武宗皇帝左右近習多昏酣宸濠賂遺甚有與之交
通者外而孫燧許達同時被害三司而下多就拘囚又
遣其黨分收諸郡邑印信逆焰所薰視湖湘閩浙不復
在目中帆檣東下日蔽江塞遂破南康九江如摧枯拉

朽急攻安慶直瞰留都東南事勢亦孔棘矣守仁以書
生民非素属地非統轄兵非素練餉非素具徒以區區
忠義號召豪傑倉卒調度誓死討賊其報宸濠謀反疏
曰臣以區區之命誠為討賊之舉務使牽其舉動而使
進不得前擣其巢穴而使退無所據夫觀守仁血誠之
言其忠義根諸天性者固將昭日月而貫金石矣而其
牽舉動擣巢穴之見智勇殊絕視宸濠真為囊中物耳
宸濠固兇狡竟莫能逃繼之南昌破而巢穴平矣宸濠

返而渠魁執矣不兩月間地方底寧朝廷無徵兵遣將之煩地方臻反亂為治之效此功在社稷甚為奇偉乃天祐國家生此偉人而其誠與才合蓋有追蹤乎百代之上者矣使是時而非遇守仁使守仁以南昌非故屬不以討賊為已任即使討賊張虛聲待奏報而不速為撲滅之計臣等知東南安危未可必也即使朝廷之上聞變急圖遣將得人供餉得人調度得人未免延緩日時及其戡定又不知所傷人命幾何所費糧餉幾何所

費爵賞幾何所損國家元氣幾何此守仁之功所以為大也奈何功雖成矣而奸黨忌嫉不惟爵賞不及抑且媒孽多方又賴天祐我國家不使忠義抱屈終身幸遇世宗皇帝入繼大統即位未幾首錄守仁之功封新建伯世襲部下伍文定等陞賞有差當是之時海內之人又莫不以世宗皇帝能賞忠義之勲亦莫不以守仁之功為足以當封爵而不愧也是時守仁雖膺封爵徒淹家居未嘗一日柄用嘉靖六年間始起奉勅討兩廣叛

目盧蘇王受等既平以衝冒炎瘴病篤具疏辭官不待報而歸至江西南康地方病故夫以守仁江西之功論之誠已竭夫報國之忠以兩廣之還跡之又未失夫致身之義俱無可以議焉者祇以當時大臣有忌其兩廣功成疏中未叙已者乃從中主議謂其不俟命而行非大臣體遂有旨削襲爵臣等嘗為守仁寃之何則假使守仁詐病而歸與地方未平而急身謀誠為可罪然地方已平矣即不病亦當聽其辭歸以彰朝廷均勞大臣

之義矧地方已平而又病病又篤卒死於道路而人猶執其跡以罪之寃亦甚矣茲幸我皇上御極即位一詔將使天下無一物不得其所故凡平日內外大小臣工或一言有益于國家一行有益于生民者無不恤錄若守仁者其伯爵之襲臣等固謂其為皇上新政第一事也况經言官疏請往復行勘海內臣工萬口一詞咸以守仁伯爵當襲臣等謬膺撫按浙江為守仁桑梓地其得之公論稽之羣情揆之國典察諸守仁討賊之心之

功其伯爵誠宜使襲而不可泯者且方今南北多事北
寇尤甚皇上宵旰九重內外大小臣工非不兢兢圖謀
思以陳見伐叛悃誠而犂廷掃穴之績尚未有能奏者
臣等誠謂皇上宜籍守仁報國之忠致身之義皇上俯
採公議復其襲爵將見內外大小臣工皆以守仁忠義
不白於正德之季我世宗皇帝白之又稍抑於嘉靖六
七年間我皇上今日又獨能察而伸之莫不相率激勵
於守仁之忠義以報皇上矣其為聖政之光豈小哉伏

乞勅下吏部再加查議節次言官奏疏亟為上請守仁幸甚天下幸甚緣係懇乞鑒忠義復襲爵以光聖政事理為此具題奉聖旨吏部知道

題請會議復爵疏

吏部題為開讀事驗封清吏司案呈奉本部送吏科抄出巡撫江西等處地方兼理軍務兵部右侍郎兼都察院右僉都御史任題云等因又該巡按江西監察御史蘇等題同前事俱奉聖旨該部知道欽此欽遵按

查先奉本部送准禮部咨內開原任新建伯兼南京兵部尚書王守仁具文武之全才闡聖賢之絕學筮官郎署而抗疏以犯中璫甘受炎荒之謫建臺江右而提兵以平巨逆親收社稷之功偉節奇勲久已見推於輿論封盟恤典豈宜遽奪於身終爵廕仍咨吏部查議施行等因到部除新建伯王守仁照例追贈新建侯已該本部具題奉有諭旨外所據世襲一節當武廟之末造江西宸濠突然稱變事關社稷本爵親調官兵一鼓擒之

不動聲色措天下於泰山之安較之靖遠威寧之功良亦偉矣但因南寧之事停襲歲久一旦議復事體重大相應就被再行查勘以昭公論已經備行移咨去後今該前因續該奉本部送吏科抄出提督軍務巡撫浙江等處地方兵部右侍郎都察院右僉都御史趙題

云云

等因又該巡按浙江監察御史王題同前事俱奉聖旨吏部知道欽此欽遵抄送到司通查按呈到部查得王守仁以正德十四年討平逆藩宸濠之亂該本部題

奉世宗皇帝聖旨王守仁封新建伯奉天翊衛推誠宣
力守正文臣特進光祿大夫柱國還兼南京兵部尚書
照舊叅贊機務歲支祿米一千石三代并妻一體追封
欽此嘉靖八年正月內為推舉才望大臣以安地方事
該本部會題節奉欽依王守仁伯爵姑終其本身除通
行欽遵外今該前因案呈到部看得爵人於朝賞延於
世昔聖主所不能廢即如王守仁削平宸濠之變功在
社稷豈有僅封伯爵止終其身之理所據南北兩京科

道官江浙兩省撫按官交章論薦於四十年之後實惟天下人心之公是但事體重大必須廣延衆論本部難以獨擬合候命下容臣等會同五府九卿科道等官從公詳議如果新建伯應該世襲具實奏請恭候宸斷緣係開讀事理謹題請旨奉聖旨是

會議復爵疏

吏部尚書楊溥

少傅兼太子太傅吏部尚書楊 題為開讀事驗封清吏司案呈奉本部送吏科抄出巡撫江西等處都察院

右僉都御史任 題為開讀事據江西布政司呈奉職
案驗准吏部咨前事內開會同巡按御史即查新建伯
王守仁云臣等會同太師兼太子太師後軍都督府掌
府事成國公臣朱 等戶部等衙門尚書等官馬等議
得戡亂討逆者固人臣效忠之常崇功懋賞者實國家
激勸之典已故新建伯王守仁本以豪傑命世之才雅
負文武濟時之畧方逆濠稱兵南下也正值武宗巡幸
之時虐焰薰灼所至瓦解天下之事蓋已岌岌矣本爵

聞變豐城不以非其職守急還吉安倡義勤王用敵間
張疑兵得跋胡鯁尾之算攻南昌擊樵舍中批亢擣虛
之機未踰旬朔而元兇授首立消東南尾大之憂不動聲
色而奸宄蕩平坐貽宗社磐石之固較之開國佐命時
雖不同擬之靖遠威寧其功尤偉仰蒙先帝知眷圭符
剖錫之賞已榮於生前不幸後被中傷山河礪帶之盟
尚靳於身後此誠四十年未脩之缺典海內人心興滅
繼絕所望于皇上者誠不淺也先該南北科道官交章

騰荐公論益明近該江浙撫按官勘報相符功次甚確
所據新建伯爵臣等稽之令典質之輿情委應補給誥
券容其子孫承襲以彰與國咸休永世無窮之報但封
爵重大係干特恩臣等擅難定擬伏乞聖裁奉聖旨你
每既說王守仁有擒逆之功着遵先帝原封伯爵與世
襲欽此欽遵已經查取應襲兒男去後今據浙江布政
使司咨呈據紹興府申據餘姚縣申內開勘據該圖里
鄰呂本隆等結稱王正億見年四十三歲原係南京兵

部尚書都察院左都御史新建伯王守仁繼妻張氏於嘉靖五年十二月十二日所生嫡長親男向因伊父先年節次剿平南贛樂昌等處山賊恩蔭一子世襲錦衣衛副千戶本官見任前職並非旁枝過繼亦無別項違碍相應承襲伯爵等因給文起送到司擬合起送為此除給批付本官親賁赴部告授外今將前項緣由同原來結狀理合脩送咨呈施行等因到部送司案呈到部看得浙江布政使司查勘過見在錦衣衛副千戶王正

億委係新建伯王守仁嫡長親男並無違碍相應承襲
一節既經奉有前項明旨合無將王正億准其承襲新
建伯伯爵以後子孫世襲但恩典出自朝廷未敢擅便
等因隆慶二年十月二十五日少傅兼太子太傅吏部
尚書楊溥等具題本月二十七日奉聖旨是王正億准
襲伯爵欽此

再議世襲大典

吏部等衙門少傅兼太子太傅尚書等官楊溥等題為

懇乞聖明再議世襲大典以服人心以重名器等因奉聖旨該部知道欽此欽遵抄出到部送司案查先為開讀事該科道等官都給事中辛自修等及南京戶科給事中岑用賓等各奏荐原任新建伯王守仁應復爵廕等因該本部題奉欽依脩行江西撫按衙門查勘去後續該江西撫按官任士憑等查勘得原任新建伯王守仁應復伯爵等因又該浙江撫按官趙孔昭等會荐前來隨該本部題奉欽依會同太師兼太子太師後軍都


督府掌府事成國公朱希忠等戶部等衙門尚書等官
馬森等議得本爵一聞逆濠之變不以非其職守急還
吉安倡義勤王未踰旬朔而元兇授首立消東南尾大
之憂不動聲色而奸宄蕩平坐貽宗社磐石之固較之
開國佐命時雖不同擬之靖遠威寧其功尤偉委應補
給誥券容其子孫承襲以彰與國咸休永世無窮之報
等因奉聖旨你每既說王守仁有擒逆之功着遵先帝
原封伯爵與世襲欽此欽遵案呈到部看得新建伯王

守仁一事始而江西撫按勘議繼而府部科道會議揆之公論似亦允協乃今南京十三道官復有此奏係于賞延重典臣等難以獨擬合候命下容本部仍照例會同在京應議各官覆議明白具奏定奪未敢擅便伏乞聖裁等因五月十五日奏奉聖旨是欽此欽遵查得誠意伯劉基食糧七百石乃太祖欽定靖遠伯王驥一千石新建伯王守仁一千石係累朝欽定多寡不同今該前因臣等會同太師兼太子太師後軍都督府掌府事

成國公朱希忠等戶部尚書劉體乾等議得國家封爵之
典論功有六曰開國曰靖難曰禦邊曰平番曰征蠻曰
擒反而守臣死綏兵樞宣猷督府剿寇咸不與焉蓋六
功者闢社稷之重輕係四方之安危自非茅土之封不
足報之至於死綏宣猷剿寇則皆一身一時之事錫以
錦衣之廕則可槩欲剖符則未可也竊照新建伯王守
仁乃正德十四年親捕反賊宸濠之功南昌南贛等府
雖同邦域分土分民各有專責提募兵而平鄰賊不可

不謂之倡義南康九江等處首罹荼毒且進且攻人心
搖動以藩府而叛朝廷不可不謂之勁敵出其不意故
俘獻於旬月之間若稍懷遲疑則賊謀益審將不知其
所終攻其必救故績收乎萬全之畧若少有踈虞則賊
黨益繁自難保其必濟膚功本自無前奇計可以範后
靖遠威寧姑置不論即如寧夏安化之變比之江西難
易迴絕遊擊仇鉞於時得封咸寧伯人無間言同一藩
服捕反何獨於新建伯而疑之乎所據南京各道御史

欲要改廕錦衣衛於報功之典未盡激勸攸關難以輕
擬合無將王守仁男襲新建伯王正億不必改議以後
子孫仍照臣等先次會題明旨許其世襲但予奪出自
朝廷臣等未敢定擬伏乞聖裁奉聖旨王守仁封爵你
每既再議明白准照舊世襲



王文成全書卷三十八